



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim TAPAK 7

Mandaviya-i teni nung inokba covid vaccine 'INCOVACC' tenzüksüogo

Zelenskyy-i Western tank tem tekeraba nung agütsütsü ajungshir



VOL. XX NO. 105 (ADOK 105) DIMAPUR ROGONÜ (FRIDAY)

ANEJETI (JANUARY) 27, 2023

₹ 5.00

General election atema ENPO tanga-tetba tajung kati arutsü imlar: CM Rio

Kohima, Aenjeti/January 26 (TYO): February 27 nü state general election nung shilem magitsü lemteta aliba Eastern Nagaland kin tenet rongnung tangatetba tajung kati arutsü imlar, ta Nagaland Chief Minister Neiphiu Rio-i Brehostibarnü ashi.

Kohima nung Republic Day benjongmung mapang osangbener temi Eastern Nagaland district tem nungi menden 20 atema shingai nomination magütsütsü ta Eastern Nagaland Peoples' Organisation (ENPO) ajanga sangdonga aliba indang asungdang dang Rio-i iba telangzüba ya agütsü.

"Par telemtetba atema ni ashitsü kecha maka saka democracy nung sorkar ka tentettsü asoshi elected representative alitsü ya Constitution nung mela lir aser parnok tangatetba tajung kati arutsü ni imlar," ta CM Rio-i ashi.

Aruya aliba election nung Nationalist Democratic Progressive Party (NDPP) aser BJP tsungta pre-poll alliance ama menden 40:20 lemsaba mech jashitepba aser mepelai ola adoktepba indang asungdang

dang, molungtepa aliba 'seat sharing arrangement' nung NDPP-i ajang-ajanga anidaksü, ta Rio-i ashi.

Menden lemsar tokteptsü renemba sülen BJP ticket aginer aikati aser party lenirtemi temolung masüba lemsatöp aser menden ya 30:30 asütsüla mesüra BJP ya kisung nokdaksüla, ta akhangar.

BJP lenir kari menden ya 30:30 lemsatsüla ta akhangba NDPP-i agizüksü asü ta asungdang dang "Yamaji masütsü... ibai lemtetogo aser onok yangji nokdaka lir. Iba atema jembishini akadang ajak liasü," ta Rio-i langzü.

Ajisüaka BJP central leaders tem den telemtetba agiba ama inyaksü, ta Rio-i nenshia ashi.

"Party ana tsungta 'friendly contest' malitsü aser onok telemtetba nung nokdaka lir... par menden nung onoki yaritsü aser ozü menden nunga parnok yaritsü."

NDPP candidate tem tenung sangdongtsü indang asungdang dang, constituency lemsaba hopta tatemlen renemtsü aser iba sülen NDPP ajanga candidate tem tenung sangdongtsü, ta Rio-i ashi.

NLA elections nung tetsür nem ticket agütsütsüla: NMA

Dimapur, Aenjeti/January 26 (TYO): Naga Mothers' Association ya lokti tentet ka ama yimtenren tsütsü tashi agütsütsü densema tetsür temeden asoshi nokdaka arur aser state nung political party balala indang lenirtem dang aruya aliba general election nung tetsür candidate ajungmesoa parnok nem party ticket agütsütsü ajungshir, ta sangdong ka ajanga ashi.

Tetsür-tebur kasa aser tetsür nem tashi agütsütsü ta political

party temi nangzükba kuli sayutsü tang ya mapang lir. Tetsür candidate tajung aika iba election asoshi renema lir aser party ticket bushiba mapang lir ta asenoki kanga junga meteta lir. Nagaland Legislative Assembly nung asenok tenung nung toktepa amentsü asoshi Naga tsür nem maangka agütsütsü mapangji tang dang nungi tajungba malitsü, ta NMA ajanga ashi.

Yimya tajung nung item tetsürtem shimtetsü onok teimla lir, ta sangdong ajangasa ashi.

Republic Day benjongmung shibangba sentong agiogo

Dimapur, Aenjeti/January 26 (TYO): State sasap nung 74 buba Republic Day shibangba sentong Nagaland Civil Secretariat Plaza, Kohima nung Home Commissioner, Abhijit Sinha, IAS ya tesemdangertongti ka ama agia liasü.

Parade Contingents nung Assam Police-i mezüing jenjang ngutet, 15th NAP (IR) Mahila BN tanabuba aser 37 Bn BSF tasembuba jenjang nguteta liasü.

Exhibition Stalls nung Agriculture Department-i mezüingbuba jenjang ngutet aser tanabuba aser tasembuba jenjang ya Department of Land


Resources aser Department of Veterinary & Animal Husbandry ajanga nguteta liasü.

Kasa sentong nung IGS Academy Girls XI aser NASA 'C' Girls XI tsungta exhibition football match ka asaya liasü. Iba asaya nung IGS Academy Girls XI ajanga goal 5-0 agüja takok angu.

Iba sentong nung Nagaland Police Training School Brass Band, 1 Assam Rifles pipe band, Nagaland Police Auxiliary Brass Band aser 15th NAP (IR) Mahila Pipe Band ajanga band display shilem agia liasü.

Iba sentong ya 'beating of retreat' agia tembang.

R-Day nung Nagaland Governor-i terenlok asoshi jemb



Nagaland Civil Secretariat Plaza, Kohima nung January 26, 2023 nü 74 buba Republic Day amungdang Nagaland Governor Prof Jagdish Mukhi-i parade contingent semdangba noksa nung angur.

Kohima, Aenjeti/January 26 (TYO): Linük indang 74 buba Republic Day benjongmung nung Nagaland Governor Prof Jagdish Mukhi-i jila aser yimtsungtem tsungta terenlok tsütsü tepila aliba ajemdaksütsü nungdakba ashi, koba technology tsütsü terenlok aliba ajanga tali adoker.

Secretariat Plaza, Kohima nung Chief Minister Neiphiu Rio aser par cabinet zungsemtem lia benjongba sentong nung jembidang, tetsükdaksü aser timtem balala liaka Nagaland-i alizüing jenti tongtetogo aser linük yangerba maparen nung sako shilem agir kumogo, ta Governor-i ashi.

Sector ajaklen nüburtem ajangzüksüsa ali rongsen aser nübu amshitetsü asoshi state resources bushitsü nungdaker, ta pai ashi.

"Tajemzükba jenjang nung alirtemi nungdakba meperitsü tashi asenoki tarutsü nung merangloket, aser ano Scheduled Castes, Scheduled Tribes aser tajemzükba jenjang nung alirtem nem tashi balaka agütsütsü asoshi tali temolung agütsütsüla," ta pai ashi.

Item jenjang nung aliba nüburtemi linük ainba aser

terenlok metettsü asoshi sorkari maangka agütsütsüla, ta pai ashi.

Iba atema pai jila aser yimtsungtem tsungta terenlok nung tawa adoka aliba ajemtsü nungdak, ta pai ashi.

"Ibaji ataloktsü atema tesem tezülen nunga technology tajung aser kasa agütsütettsüla," ta pai ashi.

Iba atema teratetba, tesendaktep tajung, lokti nung tera junga ayangba aser khuret aser tejangraba angatetba nungdaker, ta Governor-i ashi.

Nüburtem aayanga alitsü asoshi Nagaland nung coffee aser rubber plantation nung sodaker mapang talangka arur saka processing unit, mode of harvest aser mechanism tsütsü technology nungdaker, ta pai ashi.

State nung aser state alema oa technology ya livelihood enterprise kumdaksütsü atema ajak asoshi mass marketing avenue nung rangloksüla, ta ashi.

Aluyimba tsütsüa technology terenlok nung rangloksüsa hadir tajungba bushiteta amshitsüla, ta ashi.

Tenük ajak nungi nüktzü maidokma tashi aseni nangzükba

kodanga mataloktsü ta Gandhi-i ashiba athishia jembidang, item nükjidong nung takok angutsü atema terenlok tsütsü national movement ka nungdaker, ta Mukhi-i ashi.

Iba movement nung senso ajaki shilem agitsü nungdaker, mawajem alirtem awajemtsüla, nüburtem tenzükba nung temelenshi agitsüla, human resource development, entrepreneurship, role of homemakers, environment development aser yimtenren nung lanurtemi shilem agitsüla.

Naga nungeri Atmanirbhar Bharat nungi tajangzük agia terenlok aser yimchiyimjung lenmang leni anitsü imlar, ta pai ashi.

Kasa mapang India nunger nüjiso bushir million aika azü dokshiba aser asentzü sendokba pai bilemteta liasü.

State yimtiba nung iba anogomung nung Central aser State security forces nungi parade contingent 13-i march past nung shilem agi, kin balala nungi sobaliba yimya balala agi shilem agi, Women Resource Development Department ajanga linük meimba ken nung tsüngsanga liasü.

Republic Day 2023 nung award balala agütsü

Dimapur, Aenjeti/January 26 (TYO): Pei tenzükba wadang nung tatishitsü keta dangar dak nungi alakteta inyakba asoshi 74 buba Republic Day nung award balala agüja liasü.

January 26, 2023 iba anogomung mapang sempet angur yamai alitsü:

Independence Day 2021 nung sangdongba ama President's Police Medal for Distinguished Service: K. Martin Pienyu, IPS, IGP (INT), Nagaland, Kohima.

Republic Day 2022 nung sangdongba President's Police Medal: RothihuTetseo, IPS, Commissioner of Police, Dimapur, Nagaland.

Independence Day 2021 nung sangdongba President's Police Medal for Meritorious Service: Vekhosa Chakhesang NPS, Commandant, 2nd Bn. Republic Day 2022 nung

sangdongba President's Police Medal for Meritorious Service: Rankathung Vikram Ezung, NPS, AIGP (OPS), PHQ.

President's Police Medal (PPM) for Distinguished Service: Etssimongo Ngullie, DIG (Range), Mokokchung, Nagaland. Police Medal (PM) for Meritorious Service: Israel G Xuivi. Dy. Commandant, 6th NAP Bn. Tizit, Nagaland, aser Abel Jonsuo Humtsoe, UBI, INT, HQ Kohima, Nagaland.

Screening Committee ajanga recommendation agütsüba nung ajemdaker Nagaland Governor-i agizükba ama item nisungtem nem Republic Day nungtem nung January 26, 2023 nü Governor's Gold Medal agütsütsü shimteta sangdong:

1. Er. P.Tiakaba Yimchunger, Jr. Engineer (MIS), Office of the Executive Engineer Transmission Division,

Dimapur.

2. Dr. Anungla Imdong Phom. Addl. Director, DUDA.

3. Aotula T. Imchen, IPS, S.P. Mokokchung.

Governors Commendation Certificate Awardees (Republic Day, 2023 nung sangdong):

1. Vechikhoyi Lohe, Principal, GHSS, Pfuetero.

2. Lucy Doungel, UBI, DEF, Phek.

3. Thejazelle Kire, UBSI, Int. Estt.

4. Ronchamo Kikon, Subject Matter Specialist, Directorate of Agriculture.

5. S.Yaongsanglee Chang, Regional Transport Officer, Kohima.

6. Dr. Fr. Francis Sebastian Cheerangal, Principal, St. Xavier College, Jalukie, Peren.

7. Karen Yephthomi, Principal, GHSS, Chumoukedima.

State kübok district balala nung Republic Day takok ngua mungogo



Mokokchung



Dimapur

Dimapur, Aenjeti/January 26 (TYO): Linük ajunga den liromedema Nagaland kübok district balala nung January 26 nü 74buba Indian Republic Day anogomung takok ngua mungogo.

MOKOKCHUNG: Mokokchung taküm Republic Day sentong Imkongmeren Sports Complex nung agia liasü. Sentong nung Advisor, F&CS, LM&CP, Nagaland, Pukhayi Sumi-i linük wako salatsü aser Republic Day o jembia liasü.

Sentong nungsa parade contingents teku-i (DEF Mkg, 2nd NAP, 13 NAP (IR), NHG, Pensioner (Defense Personnel), NCC MGHSS, NCC QMHSS, Bharat Scout and Guide aser Band Platoon 2nd NAP Alichen) March Past nung shilem agi, kong Parade Commander ji Mayangniken Asst. Comdt. 2nd NAP aser 2nd in Command ji ABI Imlionen 2nd NAP liasü.

Sentong nungsa Cultural Club Khensa aser Naga Wadir Club Ungma nati sobaliba tsüngsang saya aser Watsu Mungdang o Govt. Lady Officers; Uniform Personnel & Non-Uniform Personnel na arr atsütepa liasü. Iba sülen Advisor Pukhayi Sumi-i department balala indang Exhibition Stalls tem lapoktsü.

DIMAPUR: Dimapur nung Republic Day sentong DDSC nung agi, kong PHED Minister, Jacob Zhimomi alakteta jaoker liasü.

Taküm Parade contingent nung Police Commissioner, Dimapur, 15th NAP (IR) MahilaBn, Home Guard, Ex-Servicemen, NCC Dimapur, Govt College, Govt High School, Burma Camp, Govt High School, Lingrijan, 43 AR Band Platoon densema liasü. Platoon aser contingent tem ya Parade Commander, Imkongsangba Jamir, NPS, (Asst. Commissioner of Police East Dimapur) And Parade 2 I/c, Neichuzo Rio (ABI Police Commissionerate, Dimapur) aser Parade BHM, Havildar Khekato Sema (Police Commissionerate, Dimapur) nungeri ania liasü. Sentong nungsa AIKO Culture Troupe Pimla-i sobaliba saya ka sayu, Holy Cross Higher Secondary School-i ken ka aten aser Vidyapith Higher Secondary School, Dimapur-i tsüngsang ka saya liasü. Nikongtsütsü

sentong nung sempet agütsüba mapa aser 43rd Assam Rifles-i retreat sentong ka ayongzüka agi.

TUENSANG: Tuensang nunga RD sentong ya parade ground nung agiogo kong Yangseo Member & Deputy Speaker NLA Government of Nagaland alakteta jaoker liasü. Sentong nung alakteta jaokeri linük wako salatsü aser Rashtriya salute agizük aser Superintendent of Police Tuensang, Kanchan Kumar Kandpal-i parade asadanga liasü.

March past nung DEF Tuensang, 3rd NAP, V.G Tuensang Village, V.G Chingmelen, ex-servicemen aser Band platoon-i shilem agi. Parade contingent tem ya Manish Bhartiya SDPO Tuensang aser Tyuyamki Yimkhiunger nati ania liasü.

Sentong nungsa Changen Cultural Club aser Sangli Cultural Troupe-i sobaliba kenten aser tsüngsang saya liasü.

MON: Mon nung 74buba Republic Day sentong Local Ground nung agiogo. Iba sentong ya SP, Mon, T. Uniel Kichu, IPS-i Parade asadanga tenzü.

Iba sülen alakteta jaoker Minister of Health & Family Welfare, S. Pangnyu Phom-i linük wako salatsü aser Parade asadanga.

Sentong nungsa Parade Commander, Asst. Commandant 6th NAP, K. Hekato Sumi-i anir March Past Contingent teneti shilem agia liasü.

Sentong nungsa Aman N Konyak-i ken ka aten aser Mon Vale College Cultural Troupe-i sobaliba tsüngsang ka saya liasü. Nikongtsütsü sentong nung sempet alemba mapang agiba kentenba telok balalai ken atenba sülen 6th NAP Pipe Band-i sentong shibangja liasü.

KIPHIRE: District ajunga den jangyumedema Kiphiri nunga 74buba Republic Day sentong public ground nung agiogo, kong MLA, Yitachu alakteta jaoker liasü. Pai linük wako salatsü aser parade contingent trok nungi salute agizüka liasü.

Sentong nung Kisetong village cultural troop aser Sitimi yimtsüng nungi Nilejo cultural troupe-i sobaliba kenten aser tsüngsang saya liasü aser

Khumtsase Sangtam-i ken ka tena liasü.

Maneni Agri & Allied Departments, KVK, Election, Veterinary aser Medical Department-i exhibition stall tem lapoka liasü.

Iba anogo nüngdem nung ADS Supply department, MS aser DWO-i District Hospital aser District Jail semdang aser DPO (LRD) aser DPRO Kiphire-i Shalom Children House semdanga liasü.

LONGLENG: Longleng nung RD sentong nung alakteta jaoker Advisor Horticulture & Border Affairs, Mhathung Yanthan liasü. Iba sentong ya public ground, Longleng nung takok ngua agiogo.

Sentong nung alakteta jaoker-i linük wako salatsü aser iba sülen parade contingent trok nungi salute agizüka liasü.

Aman aser medemertemi Modern Folk Fusion ken atenba, alakteta jaokeri exhibition stall tem lapoktsüba aser Team Naro aser Team Manthei na tsüngda Volleyball Exhibition Match ka asayaba amala sentongtem ayongzüka agiogo. Sentong nung sorkar ketdangsürtem, NGO, lokti tentet balala aser Longleng nung aliba nüburtemi shilem agia liasü.

NOKLAK: Noklak nung RD sentong public ground, Noklak Hq nung agia liasü. Sentong nung Advisor, Village Guards, and Information & Public Relations, S. Keoshu Yinchunger-i linük wako salatsü aser contingents pongu nungi Rashtriya Salute agizüka liasü.

Advisor-isa, Agri-allied departments, Horticulture Department, Fisher & Aquatic Resources Department, aser Noklak District Handloom & Handicrafts Council-i lapoka aliba stall tem lapoktsü.

Iba anogomung nüngdem nung Department of Food & Civil Supplies-i Adora Children's Home semdang aser Indian Red Cross Society-i District Hospital, Noklak semdanga liasü.

CHANGTONGYA: Changtongya nunga January 26 nü SDO (C) Office complex nung Republic Day takok ngua mungogo.

Sentong nung Rorheu Peseyie NCS SDO (C) Changtongya-i linük wako salatsü aser Rashtriya Salute agizüka sülen Republic Day o jembia liasü.

Angh-i Bishu benjung salem lemsatep

Dimapur, Aenjeti/January 26 (TYO): Nagaland aser Assam Angh Prof. Jagdish Mukhi-i Kachari nung aser Nagaland nung aliba nüburtem den Bishu benjung salem lemsatepogo.

Iba benjung ya alu aruba sülen amunger koba temeim, jungtepshiba aser temeim mapa inyakba agi meketa lir.

Benjung mapangsa Kachari nung aser sobaliba aser tamangba yimsü dak sendakba nung inyakyim balala sayar aser benjung pelatepa amungba den temaotsü meshia amunger.

Benjung amungba mapang nenok ajak tekümzüka kübok pelatepa amungtsü imlaja atar. Tsüngremi Nagaland moajang, ta Angh-isa ashi.

Feb. 2 nü NNC tenteter küm 77 ajungba anogomung amungtsü

Kohima, Aenjeti/January 26 (TYO): Naga National Council (NNC) Urta Nagaland-i tanü sangdong ka ajanga, NNC kümteter küm 77 ajungba anogomung February 2 nü Kohima nung ayongzüka amungba mapang metenteterem dang Nagaland kübok region ajak nung iba aogomung ayongzüko

amungtsü metetdaksüogo.

Kasa sangdong ajangsa Nagaland kübok Arogo ajak dang Naga nung linük kümzüka ayutsü atema sarasadem mapa ka ayongzüka katsütsü mepeshia metetdaksüogo.

Iba osang ya NNC joint secretary Acuyi Vadeo-i metetdakja liasü.



Januaru 26 nü Governor, Prof. Jagdish Mukhi aser Chief Minister, Neiphiu Rio nungertemi Secretariat Plaza, Kohima nung exhibition stalls semdangdang tangokba noksa nung angur.

Mokokchung DC-i JNV indang metetdaksü

Dimapur, Aenjeti/January 26 (TYO): Deputy Commissioner Cum VMC Chairman, Mokokchung District, Shashank Pratap Singh IAS-i sangdong ka ajanga, Jawahar Navodaya Vidyalaya (JNV) nung züngoksemtsü atema Registration, Online Portal ka ajanga asütsü aser iba atema link NVS website nung

angutsü, ta metetdaksü.


Application benoktsü atema tatembangbuba anogoji January 31, 2023 asütsü aser 2023-2024 session atema selection test ya April 29, 2023 nü agitsü.

Kaketshir timba züngoksemdaksütsü atema ajak dang Registration aser Selection Test agitsüba anogo temulung dang ayutsü atema DC-isa metetdaksüogo.



26 Aonglenden Assembly Constituency, Nationalist Democratic Progressive Party (NDPP) office-i achayanga par constituency kübok unit 7 - Dilong, Arkong, Sangtemla, Marepkong, Kúpza aser Settsü nüburtem atema Nagaland Chief Minister's Health Insurance Scheme (CMHIS) special camp ka Marepkong community hall nung akaba mapang tangokba noksa nung angur. CMHIS ya talisa sensakertem atema kanga dang nungdakba sentong ka lir, ta 26 Aonglenden A/C NDPP tir, Nungsangmeren Longkumer-i osangzülurtem den jembidang metetdaksü. Mokokchung, January 25, 2023.

Republic Day nü PM Modi-i asür sepaitem nem akhüm agütsü



January 26, 2023 nü 74buba Republic Day anogomong nung Ato kilonser, Narendra Modi, Chief of Defence Staff General Anil Chauhan aser Chief of Naval Staff, Admiral R Hari Kumar nungeri New Delhi nung aliba National War Memorial nung asürtem nem akhüm agütsüba noksa nung angur.

New Delhi, Aenjeti/January 26 (Agencies): Brihostibarnü India nunger 74buba Republic Day anogomong nung Ato kilonser, Narendra Modi-i linük atema taküm bendanga agüja asür sepaitem nem akhüm agütsüo.

Republic Day benjung tenzüka mezüngbuba National War Memorial nung asürtem nem akhüm agütsüba sentong agia liasü. Modi National War Memorial tonga aruba mapang nung Defence Minister, Rajnath Singh-i pa agizük. Modi-i naro yutsüba mapang nung Inter Services Guards-i prangpong amshia asürtem nem akhüm agütsü.

Iba sülen minute 2 shi ola madoki asür sepaitem nem

akhüm agütsü aser Ato kilonser Modi-i National War Memorial indang Visitor's Book nung tebilemba zülua toktsü.

War Memorial nung sentong tembangba sülen Modi den tongti ketdangsertem Republic Day Parade nung adentsü atema Rajpath-i ao.

Anepdang Modi-i linük nüburtem den 74buba Republic Day salem osang lemsatepa liasü.

Modi-i Hindi oshi nung twitter ajanga, "Iba linük nüchiso atema rarartem mangdang atangji ataloktsü atema asenoki longjemer tejakleni aotsüla. India nunger senso ajak den tepela Republic Day salem lemsateper," ta lemsatep.

Hopta piyong benjung ya January 23, Netaji Subhas Chandra Bose asoba anogomong nung tenzüka liasü. January 23 aser 24 anogo na nung New Delhi nung 'Military Tattoo and Tribal Dance Festival' ayongzüka agiogo.

Item sentong maneni agia aoba sülen January 30 nü 'Martyrs Day' nü tembangtsü.

Brihostibarnü Republic Day parade anepdang 10:30 ako nung tenzüker aser parade nung India nunger raraba hadir balala sayaba densema shilem balala agi.

Parade nung Colonel Mahmoud Mohamed Abdel Fattah El Kharasawy leniba nung Egypt Armed Forces sepaitemia shilem agia liasü.

January 30 nü Congress party pur 'Bharat Jodo Yatra' tembangtsü

Srinagar, January 26 (Agencies): Rahul Gandhi leniba nung 'Bharat Jodo Yatra' anogo ka anena ataba sülen Hokolbarnü asentenshir Jammu & Kashmir kübok Banihal jila nungi tenzüksü; Yatra sentong ya January 30 nü Srinagar nung tembangtsü.

Osangbenertem den jembidang Congress general secretary, communications, Jairam Ramesh-i, "Asüngnep Banihal nungi Bharat Jodo Yatra asentenshir tenzüksü. Onoki yashi mayimjemetba tesem ajak ayimjema jajatsü," ta metetdaksü.

Hokolbarnü Kashmir valley atongtsü aser January 30 nü Srinagar nung yatra tembangtsü.

Ramesh-i, Jammu kübok district aika nung yatra agiogo aser kilometer 90 ayimjemogo, ta ashi. "Onok aoba tesem ajak nung nüburtemi junga

agizükogo. Rahul Gandhi-i telongjem, temeim aser yimjung atema nokdaker, ta ajaki metetogo," ta paisa shisem.

"January 30 nü yatra tembangtsü jelia Srinagar nung Rahul Gandhi-i osangbenertem senden nung jembitsü," ta Congress lenirisa metetdaksü.

Ramesh-i, "Iba yatra ya India nunger yimtenren nung temelenshi tuluka liasü. Iba ya Narendra Modi-i agiba sentongtem ama masü saka India nunger yimtenren nung temelenshi tulu adoktsü atema agiba sentong ka liasü. Iba ya nüburtem nem rajemdaksütsü atema agiba lokti sentong ka lir. Iba ya ajangasa Congress party-a tashi itdaksür," ta metetdaksü.

Tasüngdangba ka langzüdang Ramesh-i, Jammu & Kashmir nem tanaben state jenjang agütsütsüla, ta ashi.

"Linük nung Union territories nem state jenjang agütsüba tatishitsü aika lir. Linük nung state ka nungi Union territory kümtsüba state jibo Jammu & Kashmir dang lir. Jammu & Kashmir nem tanaben state jenjang agütsütsüla aser Ladakh ya linük temzüng nung Sixth Schedule küboki aiddaksütsüla," ta pai ashi.

Bharat Jodo Yatra ya yaküm September 7 nü Tamil Nadu state kübok Kanyakumari nung tenzüker aser state aika ayimjema jajaba sülen January 19 nü Punjab nungi Jammu & Kashmir tonga liasü.

January 30 nü Srinagar nung aliba Congress party headquarters nung Rahul Gandhi-i linük wako ajungketa iba sentong tembangtsü aser yimti nung aliba Sher-e-Kashmir Cricket Stadium nung lokti senden ka nung jembitsü.

Mandaviya-i teni nung inokba covid vaccine 'INCOVACC' tenzüksüo

New Delhi, January 26 (Agencies): Brihostibarnü Union Health Minister, Mansukh Mandaviya-i alima nung tang mezüng teni nung inokba Covid vaccine INCOVACC tenzüksüo.

Iba sentong nungji Union Minister of State for Science & Technology, Jitendra Singh-a liasü.

Union health ministry-i, INCOVACC ji jelia mangaba nija hospital tem nem mezüng agütsütsü, ta metetdaksü.

Iba sentong nungji jembidang Mandaviya-i, alima nung vaccine supply asüba shilem 65 bo India nungi lir, ta ashiba den külemi iba vaccine yanglutetba atema pai BBIL team aser tenüngsang agütsü.

Mezüngbo küm shia dose million aika yanglutsü saka nüngdakba ama dose billion 1

tashi yanglutsü. State sorkartem aser India sorkari khen nungi dose aika alizükba mapang INCOVACC ya dose ka nung sen 325 agi ayoktsü.

Iba vaccine yangluba company-i sangdong ka ajanga, tang iba vaccine ya CoWIN nung angutsü aser nija markets nung dose shia sen 800 asütsü aser Centre den state sorkartem atema dose shia sen 325 asütsü, ta metetdaksüo.

Bharat Biotech-i yangluba INCOVACC vaccine ya alima nung teni nung yokba COVID-19 vaccine mezüngbuba lir. Iba vaccine ya Bharat Biotech International Limited (BBIL)-i Department of Biotechnology, Ministry of Science & Technology kübok PSU-Biotechnology Industry Research Assistance Council (BIRAC) den senteper yanglu.



Thiruvananthapuram, January 26, 2023: Brihostibarnü Raj Bhavan nung 74buba Republic Day anogomong sentong nung Kerala Angh, Arif Mohammad Khan aser pa kinungtsü Reshma Arif nati tanur ka nem nanglong agütsüba noksa nung angur.

Delhi LG-i Kejriwal den AAP MLA tem senden nung adentsü jaok

New Delhi, January 26, 2023 (Agencies): Tang Delhi nung Delhi Lieutenant Governor, VK Saxena aser AAP sorkar na tsüngda tashi raktepba mapang nung LG-i Delhi Chief Minister Arvind Kejriwal den par ministers aser AAP MLA 10 Hokolbar nikongdang ayongzükba senden nung adentsü jaokogo, ta osang ka ajanga metetdaksü.

Brihostibarnü Raj Niwas office ajanga, chief minister dang par Cabinet züngsemtem aser Aam Aadmi Party (AAP) nungi MLA mashie 10 nikongdang 4:00 ako nung ayongzükba senden nung adentsü jaokogo, ta metetdaksü.

Delhi sorkari sorkar school tem nung tesayurtem training agitsü atema Finland-i yoktsü aliba sentong LG-i ashishiba densema onük aika nung LG aser sorkar na tsüngda mangatetep lir.

January 16, 2023 nü Kejriwal leniba nung party MLA tem Vidhan Sabha nungi Raj Niwas tashi tetsüng agi oa LG,

Saxena ajurua tesayurtem training agidaksütsü atema Finland-i yoktsü asoshi mepishinüa liasü, ajisüaka LG majuruteti meyipa ao.

Iba sülen chief minister-i, LG-i kü den deputy chief minister Manish Sisodia aser AAP MLA tem ajurutsü memelunger, ta metetdakja liasü.

Ajisüaka Saxena-ibo, "Chief minister-i senden ka mennüa kü dangi shidi ka zülü, ajisüaka ni shidi ajanga CM dang, mapang tatsüka tsüngda ajungbena senden ayongzüktsüji tamakoktsü, ta shiogo," ta metetdaksü.

LG-i züluba shidiji langzüa Kejriwal-i maneni shidi ajanga LG dang AAP MLA temi pa ajurua senden ka menner, ta mepishi.

Mongolbarnü Republic Day jelia LG-i Raj Niwas nung ayongzükba sentong ka nungbo Kejriwal-i denogo. Iba sentong nungji tena kati ka pelaa agizük. Iba sentong nungji BJP aser tanga party tem nungi lenirtema aden.



January 26, 2023 nü Kartavya Path, New Delhi nung 74buba Republic Day Parade nung Egypt nunger sepaitemi shilem agiba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, AENJETI(JANUARY) 27, 2022

Khen tenzükshidi !

Naga nunger rongnung asenok Aotsür Aortem talangka tanishir süa aruogo. Aji asenoksasa tanishir akümba masü saka Tsüngrem tauchi agi asenok dangi mezüng Yisu temeim osang tajung den külemi kaketshisatsü angazükettsüsa maongka tulu aruba ajanga lir. Aji oda, asenok tsüraburtem rongnung mezüng Yisu temeim osang tajung agizüka amangertem aser mezüng kaketshisatsü angazüker chinurtem aika arogo, yimten aser lokti nung tanishir küma samanirsa aruogo. Ajisüaka, tanü item chirnurtem jagi tangar sülena manidaktetter aser tanishir-a mekümtetter ta tom nung tanishir a masü aser tanidakertema masü ta asenok aika chia masü, yia masü ta takidak maka kümogo. Iba tiaji kodang bilemdangdir, asenok tsüraburtem memesük mapang talangka kanga ayongayonga mapa meinyakba rongsen agi taküm aser kibong anisüngzüka lia aruba ajanga lir. Tanishir asütsüba ya mapa temela masü, kechiyong tangari tsübuba agi aser takoksa ajuru ajemba agi mounüba aser moutetba lenmang tasen sapoka aotsüla. Aji dang masü tanishir ka akümtsübaji tangar dang meimba shisatsü alitsüla. Iba jagi tangar timtema alirtem yarinüa yaritsü aser peiang machi aser magi tangar den lemsateptsü. Tanishirji kidang mena yur tangar tenyatsüba masü saka tangar dang tama ser nüngdakba tesem bushia nüngdakba nübortem ajurui amang agi sangwa küma apusoa aotsüba purtem lir. Tanishiri pei takar akümtsü marishir saka pei lima aser nübortem takar kümdaktsütsü meranger. Iba ama nübortem dang meimba shisatsü aliba agi nübortem tenzükba mapa nung timtem aremtetter aser tensa tamajung nunga metsübui nübortem tasü itdakja yariteper. Tanishir nüngdakba tesemji oagi center nung aser aruagi state nung tashi itta alidak tesemji masü. Kasaji, tanishirji kecha shisabolu timtem mali longsulongtua alidak menüngdaker. Aji dang masü, asenok maoyonga aser madenyonga ajungtsüba tesem aser telok nung tanishir menüngdaker. Aji oda, akhi mapang asen tsüraburtemi lenisüba agütsübaji nisungtem azüng zulu metettsübajibo yutsür, tzü chigutsüa memetet, yimjung mali, anogo shia tetsübu tia nung lepteptsüngtepa alidak tetsüng agi tsüngdong oagi shisa tenük lapokja nüchi kümdaktsüba mapatem liasü. Item chirnurtemji asenok lir. Ajisüaka, tanübo asenok tsürabur memesük tsürabur maongka nung Tsüngremi moaja government mapa kati itet nung, asenok asüküma kümer, Tsüngrema mali ama, mapai mao aser mapa meshitak inyaker rongsen bendentsü merangba purtemji asenok aküm. Kasaji tsürabur maongka nung Tsüngremi business lenmang tajung lapokja kibong anisüngzüka alitsü tenzük nung, asenoki Tsüngrem temeim amaadok. Aji oda, tsürabur maongka nung Tsüngremi asenok yimsüsür kümdaktsü nung Nebukednezzar dang nungibo tamajungba aser tasükümba küma nübortem nem Tsüngrem masü pei külemdaktsütsü bilemertemji asenok aküm. Item sülenji shirnok anidaktsü ? Aser itemji shirnok sülen anidaktsü ? Tanü joko asenok tanishir-a mekümtet aser tangar sülena manidaktet, yimten nungbo yimten nung, saka koba yimten telok nungar memetet jangjamajang aküm purtemji asenok kümogo. Joko, asenok rongsen nunga aser shisatsü nunga sensaker aküm nungji, tebok süngra ojang ta asüba tangatetba nung asenok asoshi tashibangtsü kecha maka, ajak tachila aser ajak tagila kümer mezübelangtsü tenzükogo. Ya kong nungi tenzük ? Ashiko, iba ama tia ka ajurutsüba ya asenoki timtem tilaka agia nüngdakba purtem yaria alitsü melen ayongayonga asen linüdak alitsü tenzükba anogo nung to agi tenzük asütsüa akok. Ashiko, asenoki taila bill aser allowance tilaka agitsü tenzükba anogo nung to agi asendak nungi lenisüba tashi agien asütsüa akok. Ashiko, asenoki tashiyim agi election nung akoktsü aser tokolak asütsü merangba anogo nung tosa asenok dang nungi lenisüba yimli bener ao alitsüa akok. Tanü asenok taila rongsen bendenba agi takar-a mekümtet aser tanishir-a mesütet aser tanidaktsüa memetet ta akümba timtem tia ya, ashiko, item anogotem nungi tenzükba temenentem agi kangshir asütsüa akok. Joko koda asütsü, asenoki asenoksasa melenshir Tsüngremi koda asenok meim, yamaji tangar danga meima ano khen tenzükshitsü nüngdaker. Idangji dang lenisütsü len Tsüngremi asenok dang sayutsü. Atangji, taintem asoshibo menur alitsüa akok saka asüng lanurtem asoshi bilema taintemi ochishia inyak tenzükra, taintemia ngua lanurtemi lenisüba tajung agütsütettsü.

OLEMSABANG

2024 NUNG RSS KÜM 100 AYAOKER

~ Rev. Dr. Meyu Changkiri

BJP asoshi taruba küm 2024 India General Election ya kanga tongtibang kechiaser sangküm RSS küm 100 ajunger. Sangküm Lok Sabha election temer takok ngura India ya Hindu Rashtra sangdongtsü nükjidong nükla nung mapadong ajak inyaka aoba mapang ka. Joko India nung Dalit aser Muslim na second class amai dang maparen ajak nung amshiba angur. Tat. agi, Dalit Khristan aser Muslim dalit nembo reservation magütsür. India nung Muslim o Khristan na meyokteper 20% shi süaka, Modi aniba Govt. nung Muslim nunger Cabinet nung ka dang (Khristanbo mali). India ajonga nung Muslim nunger Governor ka dang, Commission balala nung Chairman keta mali ta kümogo. Tongtibang tekolak menden ajak Hindu nunger meyong kümogo. Muslim aser Khristan nütsüng mezüindaktsütsü ozüng tesashi aika yanglua rishikangshia arudagi. Khristmas mapang Chhattisgarh nung Khristan dak koma benshi asenok ajaki meteta lir. Tongmelang agi yamai atalok:

RSS tesayuba dak amanger Hindu fundamentalist teloki December 9, 2022 nungi tenzüka Narayanpur aser Kondagaon districts Chhattisgarh nung Khristan aika tashiyim agi Hindu kümdaktsütsü merang. Iba ya kanga dang junga asameyanger inyakba mapa ka ta The South Asia Forum for Freedom of Religion or Belief (SAFFORB) kuli agütsür. Parnoki sangdongba agi Khristantem Adivasi (tribal) Hindu kümdaktsütsü mapadong balala inyaka arur, December 18, 2022, Narayanpur district nung yimtsüng 18, aser Kondagaon district nung yimtsüng 15 nungi Khristantem aridok. Shirnoksa Hindu masü, parnok yimtsüng toktsür aotsü ozüng agütsü. Aser Khristan aika dak süngtem aser merang amshia azük. Karbo tapopang tashi sükdanga azük aser nisung metsü (20) tema kanga mejungi yirur hospitali anir ao. Parnok tanü tashi hospital nung lir. Khristantem aika tesem balalai jenshia ao. Shirnok meyipa aruner, Khristan yimsü indoker Hindu akümtsüla ta ozüng agütsü aser tepsettsü ta tashi amokmeren. The Centre for Study of Society and Secularism aser United Christian Forum fact finding bushirtemi ashiba agi Mr. Manglu Koram aser Madamnar yimtak nungi Khristan kibong 21, Hindu temple kati tashiyim agi anir oa, Hindu putiri puja süa Hindu kümdaktsü ta ashi. Parnok ket nungi Temeshi Laishiba razüka bener ao. Yamaji kibong 18 tashi, yim balala nungi, tashiyim agi Hindu kümdaktsü. Khristan pur rishikangshi mapang tetsür temang mazüngi alirtem, temang nung mokokminer aser tantsür-tambur daka züka merenshi. Yamaji arur, January 2, 2023 nung Narayanpur nung Catholic Church ka amak. Ibaji nokdangdang, District Superintendent of Police kolak yiruba aser pai aniba sepaitem kar yiruba osang aser noksa nguogo.

District Administration dang Khristan amaktsü renemba osang metetdakjaka tenük amur yutsü. December 9, 2022 nungi tenzüka Khristan rishikangshiaka FIR asüba magizük. Temrugaon nung Khristan asem dak police 10-15 jakdang zükaka menokdang, aser FIR file masü. District Administration aser Police teka amteper Hindu fundamentalist den inyaker asü nung Khristan alitsü mejungi akümba lima ka kümogo. Yamaji India tesem balala nung anogo shi amai ataloka arur.

Iba ama India nung minority rishikangshidang, Nagaland kong BJP alliance lir, parnoki ola adoktetsü tim. Saka küm pungu tsüngda nung BJP asangba dak alaka, minority dak kechi ataloker iba anema ola mali. BJP lenir karibo India nung minority rishikangshi mali, onoki yamaji inyaktsü memelatsü ta election campaign nung jembiba kisüng jagi mepiritsü. BJP mapadong anemtsüla. Anungji taruba ita Nagalandelection aser 2024 Lok Sabha election nung tamangeri kanga dang sarasadema shilem agitsü mapang tongogo.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

ABAM Sunday School Tesayurtem Subject Orientation sentong agi



January 24-25 anogotem nung ABAM Sunday School Tesayurtem Subject Orientation sentong kanga takok ngua agiba sülen tangokba noksa nung angur. Arogo 39 nungi tesayurtem 190 arua iba training nung denogo.

Impur, January 26 (TYO): Impur nung January 24-25 anogotem nung ABAM Sunday School Tesayurtem Subject Orientation sentong kanga takok ngua agiogo; iba sentong ya Arogo nung Sunday School tesayurtem tasenpurtem asoshi agia liasü aser ajak agi Arogo 39 nungi tesayurtem 190 arua iba training nung denogo, ta ABAM Executive Secretary, Rev. Dr. Mar Pongener-i sangdong ka nung metetdaksü. Okila jembidang Dr. Mar Pongener-i, "Tanü Arogo nung tongtipang wadang kaji iba Deobar skol ya lir.

Tesayurtemji tanurtem asoshi ajok ka ama asünung, asen jakla aser libaliru aser aseni sayuba anaji lirumedema alitsüji kanga tongtipang lir. Anungji, mapang ajak nung tanurtem asoshi naji lenmang sayur ka asütsüsa iba tesayuba mapa ya temoatsü ka ama agizüka inyakang," ta tayongzükba tulu agütsü. Iba sentong nung Shisalen sayurtem aser parnoki jembiba onükitem ya liasü: Dr. Moanüngsang, Secretary, Literature & Education, ABAM ajanga 'Tanü Tensa nung Sunday School Ministry' onük jembiba, Dr. Arenla Lkr,

Asso. Prof. CTC ajanga 'Tangazükertem Psychology Angatetren' onük, Mrs. Narosenla Jamir, CCES, MTBA ajanga 'Tensa den Tapet Lai O Sayuba' onük, Mr. Imsentiba Jamir, Coordinator, Sunday School, ABAM ajanga 'Apiteta Sayuba' onük aser Mrs. Abenla Coordinator, Children Ministry, ABAM ajanga 'Apiteta Sayuba II' onük agia liasü. Tsüngremi maneni tesayurtemi Sunday School ajanga Pa kulisüba mapa inyakdang asen lanurtem jenti Pa metetba nung anitetang ta tamang sarasadem ayur.

Spain nung Tenla ki ana amak; nisung ka leplet aser ka yirutsü

January 26, 2023: Spain linük nung nisung kati nok amer Tenla ki ana amakba mapang nung Tenla kidang tenzüker ka leplet aser putir ka yirutsüogo. Interior ministry-i ashiba agi, aibelensangji mezüng Algeciras nung aliba San Isidro Tenla kidangi atuba sülen putir dak nok agi alepba ajanga kanga mejungi yirutsü. Iba sülen pa ano Tenla ki kati tua Tenla kidang tenzüker ka leplet. Mapang tatsüka tsüngda aibelensangji puogo. Ministry of the Interior-i

sangdong ka ajanga, "Tanü nikongdang 6:00 ako süili nisung ka Algeciras nung aliba San Isidro Tenla kidangi ayaketa atu. Pai nok amer putir amakba ajanga putir kanga mejungi yirutsüogo," ta metetdaksü. "Iba sülen pa Nuestra Senora de La Palma Tenla kidangi tua Tenla ki raksatsüba sülen Tenla kidang tenzüker ka amak. Nisungbaji kimai jena lutet ajisüaka maneni ano pa kanga mejungi yirutsüba ajanga süadok," ta kasa sangdong ajanga metetdaksü.

Iba tatalokba ya kiralongra den sendaktepa lir, ta bilemer. Spain Ato kilonser, Pedro Sanchez-i Twitter ajanga, "Iba lendong nung asür kibong züngsemtem den ni mangyim jashi lemsateper," ta metetdaksü. Algeciras nung aliba Muslim nungertemia iba tatalokba sashia aitsüogo. Algeciras ya rong ajanga Morocco nung aliba Iberian peninsula aser Spain kübok north African enclave of Ceuta na sendaktepba jila ka lir.

ANO GO ABEN TSÜNGREM DEN

Teti Adenba

"Ajiang, alima matem tashi ni nenok den teti dena lir." Kibuba shia aruba aser kotaki atuba tetsüngda anogo lir tashi liasü. "Kuli jenti agi peisasa parnok dang taküm sayu" - T.M.:1:3. Item anogo lir nütsüngtem den alidang Kibubai tesem ka nung dang nütsüng ali masü, yimya aser mapang balala nung parnok den ajurutepa jembiba liasü. Parnok dangi aoksa adoker Pai parnok jembiba ajak angashiba shia liasü. Pa tenük menguaka Thomai jembiba Pai angashiba ashi. Item anogo lir tatem nung Pai tenangzükba tejangja agütsü, "Ajiang, alima matem tashi ni nenok den teti dena lir."

Item mezüng nütsüngtemi parnok tenüki Kibuba menguaka Pa parnok den dena lir ta tangazükba tulu angazük; kasa lessonji nai aser ni angazüker asü masü? Kibuba shia aruba ajanga item tashi mait aser tasü mait nütsüngtem tasü tait aser tashi tait melenshi ta asenoki aiben angashia arur. Saka aji ochiji ibaji dang masü. Parnok tepela, mainshi aliba, Khristai kümzükba ain metsübu kulliji mapa pungu ka nung dang adokdaksüba liasü; mezüngbuba, Pa atangji shia aru; tanabuba, Pai kotak chuba menden nung ajak azüoker; tesembuba, Pa tenük agi mengui parnok den ajaklen alir; pezübuba, Pa tamaren yimli nung tanaben adoktsü; pungububa, Kibuba marudang parnok temang asütsü aser Kibuba den kidang alitsü.


Anogo lir alidang parnoki ochi angazükba tenük agi mengui Kibuba parnok den teti dena lir ta angazük. Pa temang tenük agi ngua aliba dang nungi tenüki mengui parnok den dena alibaji tali sentiba ta parnoki angazük. Pa tang parnok den tenük agi mengui dena lir- Tanela Temeshi ajanga parnok Pa dak lidaktsür ! Yamaji tanüa asen Kibuba Yisu asenok den dena lir. Pa adenbaji akhüm ka ama masü, shidakba lir. Ibai tejembiba ka dang masü, mesüra jangratemtsü o ka dang masü. Ibai teti taküm aliba Kibuba chichiba nung asenok den adenba lir.

Pa adenba tetezü, Pa asoshi kuli asüdang timatemdang ajaklen Pa dena aliba lir. Saka iba ama tenangzükba liaka aikati temulung makai akümer aser temulung masür. Koda taochitsü lir ! Kodang Pa adenba metetta melilir, asenok melamelaa temulung makai kumdaktsür, ratamatar, atasaa meliteter aser tai telemtetba agir; saka kodang Pa adenba metetta pelaa lidir, temulung makai akümdang tajung inyaktsü bilemer, rishikangshi mapang tarezmük alir, lendong mapang tasü itdaktsür, telemsatep adokdang süngjema alir, terongjen mapang nung pelaa alir. Lisem limaji kolap naro ama akümer, aser ali tapungji atsüki ka akümer. Khristantem, item otem ken shisadangang: "Ajiang, Ni nenok den tatem tashi dena alitsü...!"

Bible college ka semdangba sülen meyipa aodang Khristan 5 tsükset

January 26, 2023: Arkansas (US) nung Tsüngrem nem pei taküm bendanga agütsüba kaketshir pongui Wyoming nung aliba Bible College ka semdangba sülen kidangi meyipa aoba mapang gari lendong nung tsükseta süogo. Kaketshir Khristan pongui Tsüngrem tenzüksü jangrartem liasü. January 22, 2023 nü gari lendong nung asürtemji Sylvan Hills High School nung azünger arrshi küm 18, Susana "Suzy" Prime aser Ava Luplow (18) na aser tawa graduate asür kaketshir asem- Salomon Correa (21), Maggie Franco (20) aser Suzy teyi, Andrea Prime (23) nunger liasü. Amongnü parnoki Jackson Hole Bible College semdangba sülen kidangi meyipa aoba mapang nung iba lendong atalok. Dodge Ram gari kati passenger gari ka aser truck ka dak tsükoktsü; ibaji ajanga ano tanga truck kati lendong paidoktsü meranga lenmang tezülteni aoba mapang nung

kaketshir pongu mena aliba Ford F-150 gari dakji tsükoktsüba sülen gari anaprongla nungjagi mi adok. Iba lendong nungji kaketshir ponguprong asü aser kar yiru. Ketdangsertemi ashiba agi, Dodge Ram gari anisangji puogo aser bushisüngdang tenzükogo. Kaketshir pongu ya Faith Bible Fellowship Arogo nung züngsemtem liasü. Arogoi facebook post ka ajanga, kaketshir pongu atema tatembangbuba asüpila sentong February 4, 2023 nü anepdang 10:00 ako nung Sylvan Hills High School Performing Arts Center nung agitsü, ta metetdaksü. "Lanur pongu asüba atema ozü fellowship-i mangyimer," ta Arogoi metetdaksü. Iba lendong atalokba sülen nisung 100 dak tema Arkansas nung aliba Faith Bible Fellowship Tenla kidang adenshia candlelight service agiogo. Susana aser Ava nabo high school anasaji Humble Crumb



bakery nung inyaka liasü. Bakery kibur, Ruth aser Betsy Peters nati, Susana aser Ava na asüba osang angashia aoksar, ta metetdaksü. Osangbener den jembidang Betsy Peters-i, tawa Susana aser Ava nati peipei Instagram accounts nung post asüba Lai otem ajanga la melung sünepja liasü, ta ashi. "Tang tatalokba ya ni mamangteter. Parnok ajanga T s ü n g r e m sentsüwangshitsüogo, aser ibaji

parnok tejangraba liasü," ta Betsy-i ashi. Bakery kiburtemi facebook ajanga, "Asenok atema tesüneptsüba ka aser teimla ka lir, aser ibaji Tsüngrem nungi dang angur. Ava aser Suzy nati Yisu meima liasü aser Yisüji temenen alangzüktsüsang Kümtetdakba Kibur ta tenati meteta liasü. Parnoki Pa (Yisu) tenzüksü tebilemba liasü aser tekümtet angutsü atema Pa dak amanga liasü. Asenoki tanga parnok atema mangyimer, ajiüsüka tang tenabo Pa den külemi sentsüwangshi nung lir, ibayongji asen melung teimla agi asünger," ta lemsatep. Faith Bible Fellowship nungi Lydia VanderVate-i, "Parnoki Khrista osangtajung proktsü tebilemba liasü," ta metetdaksü. Social media ajanga Sylvan Hills High School-i, "Nüngdakba kaketshirtem aser staff tem nem counselling agütsütsü. Onoki mangyimer kibongtem den mangyim jashi lemsateper," ta metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Orenyim
(adj) oren tapu balala tadongi züluba (composition)
* Nisung kari dang **orenyim** junga amshia kakat zülutetter.
Orep
(v) touzük ajema aküm (reduce weight)
* Chiyongtsü takong akümba agi seret aodang **orep**.

OLONG PAITEP # 6410

1		2		3		4	5			
				6						7
		8								
9				10		11				
			12						13	
						14				
16						17				

TIPIEN		LANGTSÜNGLEN	
1. Nisung jenti	- (5)	1. Tenuk telong	- (9)
4. Tsük rudenba	- (5)	2. Committee dang ajar	- (5)
6. Temzüng tesashi	- (5)	3. Yagi ki okdoker	- (7)
8. S _ _ _ i	- (3)	5. Yim lenmang	- (5)
9. Nisung telemsa	- (3)	7. Temoatsü keter meyipa aruba	- (9)
10. Anogoshi	- (4)	11. Kanga junga menemba	- (7)
12. Ajanga aor	- (4)	12. Majinü	- (5)
13. Tsük rizüngdak	- (3)	13. Tzuma nung senzuba	- (5)
14. Tebang nungi adokba	- (3)		
16. Süngdong tatembanglba	- (5)		
17. Meputep	- (5)		

OLONG PAITEP # 6409 TELANGZÜBA

TIPIEN :		LANGTSÜNGLEN :	
2. Bangsemo, 6. Tiptem, 8. Jen,		1. Yipten, 3. Nüja, 4. Sangro,	
9. Talilla, 11. Aren, 12. Tzübo,		5. Milen, 7. Tulu, 10. Laza,	
14. Alia, 16. Angati, 17. Odi,		11. Aben, 12. Tiyong, 13. Ajizük,	
18. Azü, 19. Sünglang.		14. Aitsü, 15. Tasa, 16. Aina.	

YABO MELENSHIDI NI!

**ALOKBAI AOR DANG MEIM (SECRET)
O ASHIR :**

Oh..... Aor tem! Temolung tanga angang nih..... Ni Alokbai tebilemdangtsü, teinyaktsü o ka shiti. Election nung ya tangar kinbo küm 10,15,20 ta adokdaksür, repranga aru nung, political ya seniority agir, anungji tangar temaba temaba jenjangi atudang, asen Aorbo küm shia tasen, tasen dang shimer yokerji , atoker külen tasen tem tobo junior tang süli, ta takoksa lujen alur, anungji küm shia candidate melenba yimya ya indokdi, candidate temia, ozü kibong, ozü kinunger, ozü yimer ta mesüi ozü constituency ta sür mapa inyakra, asen Aora tangar sülen masü, tangarang asen sülen anidaktsü, anungji tang aruyaa aliba election yabo jungjunga bilemdangtsü, ni Alokbai ayimoktsür ah nih.....

~ Aienla Ao

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Tripura nung Rohingyas
nunger trok apu**

Agartala, Aenjeti/January 26 (Agencies): Tripura nung election agitsü lia Sepahijala district nung Kamalagar Assembly kübok Matinagar tesem nung Rohingyas nung asütsü ta temulung melemi bilemba nisung trok puogo. Iba district ya Bangladesh den arrtsü nung lir.

Source balala ajanga ashiba agi, Rohingya nung lanur trok Matinagar tesem nung Moti Mia'er indang ki tazüng ka nung hopta ka shi lia liasü.

Iba sülen police temi parnok apu aser ken o ashishitsü atema Amtali Police Station-i anir ao.

Ken o ashishiba mapang pua alirtem yagi parnok mapang talangka tejakdang Hyderabad nungi aru aser parnok idakji mapa inyaker ta ashi.

Mapang tatsüka lir parnoki parnok ya Bangladesh-i aotsü atema broker ka teyari agia Tripura-i aru ta ashi. Broker shibai parnok anir aru pa security kanga akanga aliba ajanga international arrtsü madentet, ta ashi.

Tripura: NLFT-PD züngsem ka bendanga agütsü

Agartala, Aenjeti/January 26 (Agencies):

Tenokdangba agütsür aliba National Liberation Front of Tripura (NLFT-PD) züngsem Sarnajoy Reang, Bodhbarnü Agartala Sector Assam Rifles matsüngdang bendanga agütsüogo.

Pa ya kasa telok nungi Parimal Debbarma (PD) faction den sendakpe liasü.


Assam Rifles sangdong ka ajanga ashiba agi, Agartala battalion-i parnok indang sources ajanga iba telungpur den tongtepratep tenzük aser par kinungertema dena jembishinüa, pai pa mulungka nung bendanga agütsüra pa dak kecha mataloktsü ta

tenanzükba agüja liasü. "Source-i pa den aiben jembishinüa liasü aser January 24 nü pa temulung melendaktsüteta par kinungertem den yimjung nung alitsü atema jembishinüa liasü. January 25 nü tetsükdaktsü balala aliba aser tetsübu alibatem agintsüteta pa bendanga agütsüogo," ta kasa sangdong ajanga metetdaksü.

Maneni sangdong ajanga ashiba agi, ken o ashishiba mapang telungpursang yagi, pa NLFT (PD) organization den Bangladesh NLFT camp nung tanga züngsemtem den külemi aden. Pai, Tripura nüjiso atema

rara tenzükba nükjidong sama aoba indang pa tajangshiba ajanga jangja liasü ta ashi. Ajisüaka osang ajanga ashiba agi, NLFT (PD) telok ya tang rongsen ketzüng nung tetsükdaktsü tulu adoker lir. Inyaksangshi jenjang kanga mejungi akümba aser security Forces-i maneni nongshiba sülen pa Assam Rifles matsüngdang bendanga agüja liasü. Pa angati agi temang tendangtsüogo aser chiyongtsü teperi agütsüba sülen ken o maneni bushisüngdangtsü aser tarutsü jenjangtem atema renemtsü asoshi State Police (SB Branch) nem bendanga agütsüogo.

CM Sarma-i ULFA-I dang bendanga agütsütsü ayongzük



Himanta Biswa Sarma

Guwahati, Aenjeti/January 26 (Agencies): Assam chief minister Himanta Biswa Sarma-i ULFA-I dang azütokshiba lenmang toktsür mainstream-i meyipa arutsü ayongzükogo.

Pai ashiba agi, Assam aser Northeast nung yimjung bener arutsü atema ULFA-I den sensak asemtsüji tatembangbuba alizing asütsü.

"Tanübo Assam ya ULFA tentetba mapang ama masü. Assam kanga melenshiogo aser nüburtem tebilemdangba dena melenshiogo," ta CM Sarma-i ashi.

Assam CM-isa, "ULFA-I puri mulunga kodang yimjung atema sensaksem tenzükdir state nung teti asoshi yimjung aser lenla ajak nung terenlok meyipa arutsü," ta ashi.

Paisa, yimjung atema sensaksemtsü asoshi Assam sorkari ULFA-I lenirtem den maneni tongtepratepa arudar, ta ashi.

Temetetsükaji ULFA-I pur January 26 nü general strike ka ayongzük aser Assam nung aliba nüburtem dang Republic Day benjung nung shilem magitsü ayongzüka liasü.

United Liberation Front of

Asom (ULFA) ya armed separatist organization ka lir, koba Assam nung inyaksangshir.

Parnoki Assamese nungertem atema nüjiso meshia arudar.

India sorkari 1990 küm iba telok nem tenokdangba agütsü aser iba telok ya kiralongrar telok ka kümtsü. Kasa mapang nung United States Department of State-i iba telok ya under "other groups of concern" list nung züngoksemtsü.

ULFA sources ka ajanga ashiba agi, iba telok ya 1979 küm April ita 7 nü Assam, Sivasagar district kübok Rang Ghar nung ngutet aser 1990 küm nungi inyaksangshi tenzük.

Indian Army-i 1990 küm nungi ULFA anema military operations tenzük aser tang tashi benoka inyakdar.

ULFA ya Assam nung lanur telok kati tenzük, kong Paresch Baruah, Arabinda Rajkhowa, Anup Chetia, Pradip Gogoi, Bhadreswar Gohain aser Budheswar Gogoi nung densema liasü.

Iba telok nükjidongji Assam nüjiso asoshi prangbong injang amshia tashiyim agi raratsü asoshi liasü.



Power aoba ajanga Japan anüdoklen Kyoto nung aliba Nishioji Station nung train ka anena aliba noksa nung angur. Rer aser asuk-asaba ajanga Japan nung highway, air aser train nung senzusemponger timtem ajuru aser ano temokongba akumtsü sangdonga lir.

Zelenskyy-i Western tank tem tekeraba nung agütsütsü ajungshir

Kyiv, Aenjeti/January 26

(Agencies): Russia den raraba nung bukuma tank tem yokba atema Ukraine tiri Western lenirtem dang pelaba lemsatep saka itemji tekeraba nung agütsütsü nungdaker, ta ashi.

Aonungshia pai alima den video ajanga jembidang Volodymyr Zelenskyy-i anüolen linüktem dang long-range missiles aser fighter jets tema yoktsü ajungshia liasü.

US aser Germany-i Ukraine nem Abrams aser Leopard tanks tem agütsütsü ta sangdongba sülen pai iba o ya ashi.

Russia-i iba sangdong ya khukhua aitsü aser ibai rara mesüba lir ta ashi aser supply agütsüba tank ajak samatsütsü,

ta shia liasü.

Tank tem ya tanungba tank tem ama ajak rongdoktsütsü. Item ya sen kanga tasak lir, ta Russia Tir Vladimir Putin indang odongtar Dmitry Peskov-i ashi.

Defence tsütsü asenok amalitepba nung dangalena terenlok alitsüla ta ni NATO Secretary General Jens Stoltenberg dang shiogo, ta Zelenskyy-i ashi.

Tank tem anguba sülen joko Zelenskyy-i Ukrainian air force nem technology tsütsü terenlok aliba fighter jets tem agütsütsü asoshi rangloksü ama lir, saka Western sorkari itemji maginer, kechiaser item tayimtsü amshia Russia telung nung amaktsü tsübor.

Bodhbarnü Berlin nung

Bundestag den jembidang German Chancellor Olaf Scholz-i tank tem agütsütsü sentong indang tejangja lemsatep saka Ukraine nem fighter jet magütsütsü, ta nenshia shia liasü.

US-i Ukraine dangi M1 Abrams battle tanks 31 yoktsü, ta US Tir Joe Biden-ia Bodhbarnü sangdonga liasü.

Germany-i Ukraine nunger tongpangi par indang Leopard 2s tejang 14 yoktsü ta ashiba sülen US-i iba telemtetba ya agia liasü.

Berlin-i danga European linüktem dang Germany-i yangluba tank tem tenla agütsütsü asoshi lenmang lapoktsü.

Japan anasa rong ka mükepök, nisung ti asü



Beijing, Aenjeti/January 26

(Agencies): Japan tzükum anasa tzüyim nung rong ka mükepökba nung China nunger trok densema nisung ti asü, ta Chinese diplomat kati Brehostibarnü ashi.

Jin Tian nungya China aser Myanmar nungi rong kettangsurtem mener Japan southwest tsütsü nisung maliba Danjo Islands anüolen mile 68 shi pilar tesem ka nungi Mongulbar nikongdang lendong timtem ajuruba signal ka yoka liasü.

Iba rong anisangi satellite phone amshia South Korean coast guard dang pa aser rong kettangsurtem temi tzü telungi aluba rong yutsütsü ta Bodhbarnep ashi, ta Jeju coast guard ajanga ashi.

Iba lendong ajurur alirtem bushiba maparen nung Japan

indang coast guard aser mitkar nungi rong aser tayimtsütem amshia liasü aser rong kettangsur züngsem 13 ngutet.

Yangji aliba nija rong asemia rong kettangsur pungo kumzuka liasü, ta Japan indang coast guard ajanga ashi.

Fukuoka yimti nung China indang Consul General Lu Guijun-i state broadcaster CGTN dang Brehostibarnü ashiba agi, nisung 13 ngutetba nungi nisung ti asüba jangjaogo aser item rongnung China nunger trok lir.

Par pongu - China nunger rong kettangsur pezü densema - tasütsü tia nungbo masü, ta pai ashi.

"Tia maka asürtem den asükhü lemsateper."

Chinese diplomat ajanga ashiba indang Japan kettangsurü ano jangja mesangdongtsü aser

parnoki nisung toku samar bushir aser nisung 13 kumzükba nung ana süogo, ta osangbener dang Brehostibarnü ashi.

Yangji aliba Chinese missions nungi kettangsur temi Nagasaki coast guard semdang aser parnoki asürtem atema naru yuja asükhü lemsatep, ta Fukuoka consulate ajanga ashi.

Parnoki iba lendong nungi kumzuka alirtem ajurua abensüoshi, chiyongtsü aser tajemtsü tzü agütsü, ta ashi.

Jin Tina tuozük tonne 6,651 aser iba rong ya Hong Kong nung register süa lir, ta Japan indang coast guard ajanga ashi.

2020 nunga kettangsur 43 aser nashi 6,000 aliba khu abenba rong ka southwestern Japan anasa yipru ajurua mükepök. Iba lendong nung nisung ana takum kumzuka liasü.

THE JUTE CORPORATION OF INDIA LTD.
(A Govt. of India Enterprise)
15 N, Nellie Sengupta Sarani, 7th Floor, Kolkata-700087
Phone:033-2252-1100, Fax:033-2252-1771
CIN - U17232WB1971GO1027958

Special Recruitment Drive
Backlog Vacancy - Attempt - 1

Item posts atema application meshir
Assistant Manager (Finance) - 02 nos. post (01 SC & 01 OBC),
Assistant Manager (HR) - 02 nos. post (01 SC & 01 OBC),
Assistant Manager (O/M) - 02 nos. post (2 OBC).

Fresh Recruitment
Item posts atema application meshir
Assistant Manager (Finance) - 02 nos. post (UR),
Assistant Manager (HR) - 01 no. post (UR),
Assistant Manager (O/M) - 02 nos. post (UR).

Ajak ya Regular basis nung alitsü.
Osang tejangja metettsü atema www.jutecorp.in
Applications agizüksü atema tatembang anogo:- 17/02/2023
CBC 41122/12/0017/2223

CHUMUKEDIMA ONGPANGKONG
SENSO TELONGJEM
SANGDONGER

Koba lottery ticket (COST) C. Hall atema saidagi, ibai January 23 nung result adoktsü liasü, saka koda masüba timtem kar ajanga 1st May 2023 nungang result agütsütsü sangdonger.

Asetkong Telongjem Changtongya Town
Raffle Draw
In Aid of Golden Jubilee
Draw Date : 26th January 2023
First Prize : Sl.No. 805 Second Prize : Sl.No. 931
Third Prize : Sl.No. 984
Consolation Prize (10 Nos) :
Sl. No. 2018, 645, 301, 186, 553, 992, 475, 266, 263, 532

Israel nungeri Jenin nung Israel nunger 9 tepset

Jenin, Aenjeti/January 26

(Agencies): Occupied West Bank nung Israel mitkar temi tesem kar mita aodang Palestine nunger tuko tepset, ta Palestine kettangsur temi ashi.

Iba lendong ya Jenin jila nung atalok, aser yangji tetsür tain ka densema asü, ta ashir.

Israel mitkar temi ashiba agi, Palestinian Islamic Jihad (PIJ) "terror squad" temi lendong tuluka agütsütsü tasa yanglua aliba raksatsütsü inyak.

Telungpur tem aputsü merangba mapang par aseme sepai tsütsü injang khaloktsü aser parnoka tepset. Nisung pezü bubai bendanga agütsü aser apu, ta ashi.

"Temolung melemi alirtem aliba ki ka lungbangtsü asoshi security forces temi inyak. Nok-nü bena alir südi ta temolung melemi alir ana jena aoba nguteta tepset," ta Israel Defense Force (IDF) sangdong ka ajanga ashi.

"Iba kidang temolung melemteti alir ka pa sasa security forces matsüngdang bendanga agütsü. Parnoki amshiba tapoktsü oset ana pokdaksütsü asoshi IDF combat engineering soldiers tem ki telungi ai, kong armed suspect talila ka liasü aser sepaitemi yangji khaset."

Item telungpur ya Israel nunger civilian aser sepaitem dak kiralongra mapa tulu inyakba aser sentong yangluba nung shilem tulu agia lir, ta IDF ajanga aitsü.

Iba mapang ano Palestine nunger prangbong bena alirtemi sepaitem dak injang khaloktsü, ta mitkar temi ashi.

Sepaitemi telangzüba agüja injang khaloktsü aser nisung tali asü ta jembiba bushir, ta ashi.

PIJ aser Hamas temia par telungpur temi sepaitem dak injang aser IED amshia amak ta ashi. Palestine nunger media ajanga lemsatepba video nung prangbong aser bomb apokba ola angashia liasü.

Iba tatalokba sülen Jenin nung tensa kangasa mejungi lir, kong nisung aika yiru aser ambulance tem parnok tonga moteter, ta Palestinian Health Minister Mai al-Kaila-i ashi.

Israel nungeri tear gas khaloktsüba agi yangji alima mozüki ka nung tanurtem anepaludak kongshi, ta lai ashi. IDF ajanga iba taitüba nung telangzüba magütsü.

Palestine Tir Mahmoud Abbas indang odongtar kati Israel nunger aitsü aser alima ola madoki nisung jenti samatsütsü meranger, ta ashi.

"Alimai jangja-jangja repranga lia ozü nübur samatsütsü meranga inyakba yamai ajungshir," ta Nabil Abu Rudeineh-i ashi.

West Bank nung Israel mitkar temi tanen makai kiralongrar anema raraba ajanga tawa tensa tamajungba kumogo.

Taküm West Bank nung Israel sepaitemi telungpur aser civilian tem densema Palestine nungi nisung 29 tepsetogo.

Taoba küm West Bank nung Palestine nunger 150 dak tema tepsetogo aser item ya ajak amai Israel sepaitem mapa lir. Asürtem rongnung nok-nü bena maliba civilian, telungpur aser nok-nü amer lendong agütsürtem densema lir.

Palestine nungeria Israel nunger dak tenük yoker amakdang civilian, police aser sepaitem densema nisung 30 dak tema tepsetogo.

Mumbai City FC-i Gyamar Nikum alizükogo



Itanagar, Aenjeti/January 26 (Agencies): Mumbai City FC-i I-League club Rajasthan United nungi Gyamar Nikum alizükogo, ajisüaka pa alizükba taa mesangdong.

Arishi kum 18 tain asayar ya Mumbai City nung kum pezuser tesadang asayatsü koba 2027 kum May ita tashi asütsü.

Team-i Nikum pelashishia agizüka Mumbai City FC head coach Des Buckingham-i ashiba agi, pa (Nikum) team nung züngoksema atema kanga pelar aser pa den külemi inyaksü matter.

"Sempet tajung aketba asayar Nikum club nung pelashishia agizüker. Durand Cup nung onok den aser tangar den asayaba mapang pai pa dak sempet tajung aliba sayuogo aser pa ya onok team atema tapet asütsü ta bilemer. Mumbai City nung onoki India nunger football asayar tajungibatam den inyaker aser parnok reloka

aotsü atema teyari agütsüner. Iba jenjang yagi Nikum aiter aser pai onok team nem teyari agütsütsü," ta Buckingham-i ashi.

Kasa mapang nung Nikum-i, Mumbai City FC nung adenba ya pa aser par kinungertem atema nemadangtsü mapang ka lir, ta ashi.

"Asayaba moapu nung nükjidong tulu yur asayaba dang masü club yagi ni amala lanur football asayartem renloka aotsü atema sabang agütsü. Ni coach Des (Buckingham), par staff aser club management dang kü nem iba maongka agütsüba atema kanga pelar. Ni maneni renloka aotsü, sempet tajung aketba külem asayartem nungi angazüksü aser Mumbai City atema anogoshia takokba tashi tajungtiba asayatsü imla atar," ta Nikum-i ashi.

Nikum ya Arunachal Pradesh kübok Naharlagun tesem nungi lir. Pa 2019 kum

arishi kum 15 asüba mapang BC Roy Trophy nung state tenüng nungi asayatsü atema shima liasü.

Iba asayamung nung par team semi-finals tonga asayaba nung pai tongtibang shilemagiba sülen Nikum ya Rajasthan United-i shim aser parnok indang residential academy nung asayatsü atema jaoka liasü.

Iba sülen pa Rajasthan United first team nungi asaya tenzük aser 2021 kum pa arishi kum 16 asüba mapang I-League qualifier nung asayaba asayar tanobusang rongnung ka aser Arunachal nungi mezüngbuba asayar akum. Pa mezüngbuba asaya Madan Maharaj FC den asaya liasü.

Nikum asoshi I-League 2021-22 season ya kanga tongtibang liasü. Pai Rajasthan United pur mezüngbuba I-League nung asayaba mapang pa dak sempet tajung aliba sayua liasü.

Pa asaya 18 nungi 14 nung asaya aser club pur league nung Championship Round tonga asayaba nung teyari tulu agüja liasü.

Maneni 2022 Durand Cup nunga pai kanga junga shilem agia Rajasthan United pur Group B nung qualify süa asaya liasü.

2022 kum June ita Nikum ya India U-20 team den külemi training camp ka nung shilem agitsü atema AIFF-i jaoka liasü.

Australian Open: Sabalenka aser Rybakina na final asayatsü

Aenjeti/January 26, 2023 (Agencies): Brehostibarnü Rod Laver Arena nung Australian Open tetsür kija asaya semifinal nung Aryna Sabalenka-i 7-6 (7/1), 6-2 agi Magda Linette madak takok ngua final tongtetogo.

Fifth seed asayar Sabalenka ya tang mezüngbuba Grand Slam ka nung final asayatsü lir. Final nung la Wimbledon champion den asayatsü shiba Victoria Azarenka straight sets nung kokogo.

"Ni iba asaya akokba atema kanga pelar," ta Belarus tsürla yagi ashi.

"Magda ya asayar tajung ka lir aser lai kanga junga asayaogo," ta laisa ashi.

Iba asayamung metenzük tsüngda nisung aikati Sabalenka-i taküm iba asayamung akoktsü ta imla liasü, ajisüaka lai tang tashi nung Grand Slam semi-final asem tashi asayaba nung ka danga koka mali.

Lai tang kanga junga asaya arudar aser lai iba ita tetenzüklen Adelaide International asayamung kokogo aser tang asaya terbuba nung set ka nunga danga tamakok mongui asaya arudar.

Kasa asayamung tetsür kija asaya semifinal tanga ka nung Wimbledon champion Elena Rybakina-i Victoria Azarenka straight set nung koka final tongtetogo.

Tena tsüngda asaya ya Rybakina-i 7-6 (4), 6-3 agi koka liasü.

Azarenka akokba densema Rybakina-i taküm iba asayamung nung temaba jenjang nung asayaba asayar aika tsükdaktsüogo, kong No. 1 Iga Swiatek aser No. 17 Jelena Ostapenko na aser 2022 Australian Open runner-up Danielle Collins nunger densema lir.

Teti ama asaya nung Rybakina-i service kanga ajanga ao aser ace teku tashi oa liasü.

Lai iba asayamung nung ajak senteper ace 44 oteta lir.

Rybakina ya arishi kum 23 dang lir aser Azarenka dang nungi kum 10 agi tanutsü aser la tang asaya aliba ama dang asayayonga ora tarutsü nung takok tajung nguyonga aotsü.

Rybakina ya Melbourne nung seed 22 aser world ranking nung 25buba nung dang lir, ajisüaka la sempet aser form den apitepra iba züngdangbatem ya kenyongi meputep. Lai taoba kum Wimbledon akok ajisüaka iba asayamung nung ranking points magütsü, ibayongji la ranking kanga ajema lir. Ukraine amakba ajanga All England Club-i Russia aser Belarus nunger asayartem shilem magidaktsütsü atema telemtetba agiba sülen iba asayamung atema ranking points magütsü.

Rybakina ya Moscow nung aso ajisüaka 2018 kum nungi Kazakhstan tenüng nung asaya arudar.

Wrestler tem Zagreb Open nung asayatsü atema sorkari temelaba agütsüogo

New Delhi, Aenjeti/January 26 (Agencies): Züngsem 55 agi kümtetba Indian wrestling contingent ka Zagreb Open Grand Prix nung asayatsü atema sorkari Brehostibarnü temelaba agütsüogo. Asayartem rongnung Bajrang Punia aser Vinesh Phogat nata densema lir aser iba asayamung ya Februray 1 nungi 5 tashi asayatsü.

Tawa tentettsüba oversight committee-i tetsür 12, Greco Roman 11 aser tebur freestyle wrestlers 13 iba Ranking Series-opener atema shima liasü.

Olympic silver medallist Ravi Kumar Dahiya, Anshu Malik aser Deepak Punia nungera team nung züngoksema lir ta ministry sangdong ka ajanga metetdaktsüba den sorkari senotsü intokba ajanga menoktsü ta shiogo.

Wrestling Federation of India tekolakba Brij Bhushan Singh Sharan anema sexual harassment densema ken o balala benokba bushisüngdangtsü aser WFI anogoshi inyakyim

achaayangtsü atema oversight committee ya sports ministry-i iba hopta tetenzüklen tentetja liasü.

Iba committee ya MC Mary Kom tekolak ser inyaksangshir, kong taoba wrestler Yogeshwar Dutt, taoba mapang badminton asayar aser Mission Olympic Cell züngsem Trupti Murgunde, taoba mapang TOPS CEO Rajagopalan aser taoba SAI executive director - teams - Radhica Sreeman nunger densema lir.

Ajisüaka committee metetet tsüngda parnok dang ken o mashishiba atema tezü atangba wrestler temi lemsatopogo.

Taoba hopta Bajrang, Vinesh, Ravi Dahiya nungeri anir Jantar Mantar nung anogo asem tashi wrestler temi mener longkak aita liasü. Parnoki WFI tir mapa nungi agintsü khang liasü.

Wrestler tem yagi ashiba agi, Sharan shiba BJP MP ka lir pai dictator ama inyaksangshir aser junior wrestler tem dak mebenshitsü yimya benshir.

Indonesia Masters: Lakshya Sen tasembuba round-i iogo

Aenjeti/January 26, 2023 (Agencies): India nunger badminton asayar Lakshya Sen-i, Brehostibarnü Indonesia Masters 2023 badminton tournament tanabuba round nung Malaysia nunger asayar Ng Tze Yong 19-21, 21-8, 21-17 agi kokogo.

Brehostibarnüsa tetsür kija asaya nung taoba mapang world number one asayar Saina Nehwal 15-21, 7-21 agi China tsür Han Yue-i tsükdaktsüogo.

Mezüngbuba round nung Lakshya-i Japan nunger asayar Kodai Naraoka 21-12, 21-11 agi akok aser Saina-i Chinese Taipei tsür Pai Yu Po 21-15, 17-21, 21-15 agi koka liasü.

Kasa asayamung nung Bodhbarnü HS Prannoy mezüngbuba round nung tsüka tang agi tanabuba asayamung ana atonga pa mezüngbuba round nung tsüko. Pa Japan nunger asayar Kanta Tsuneyama-i 19-21 10-21 agi koka liasü. Pa Malaysia Super 1000 nungbo semifinal tonga asayaogo saka taoba hopta India Open mezüngbuba round

nung tsüka liasü. Maneni taoba mapang world No. 1 asayar Kidambi Srikanth-a 10-21 22-24 agi asaya mekoki tsüko.

India nunger rongungi ano Priyanshu Rajawat-a 21-18 18-21 18-21 agi Indonesia nunger asayar Chico Aura Dwi Wardoyo-i koka mezüngbuba round majangteti tsüko.

Tetsür kija asaya nung Malvika Bansod atema Thai tsür Ratchanok Intanon kanga jungrara asü aser asaya 15-21 13-21 agi makok. Aakarshi Kashyap-a, Spain tsür Clara Azurmendi-i 17-21 15-21 agi tsükdaktsüogo.

Tarep temeyoktep asayar Ishaan Bhatnagar aser Tanisha Crasto nata mezüngbuba round nung France nunger tarep Thom Gicquel aser Delphine Delrue nati 16-21 15-21 agi kokogo.

Rohan Kapoor aser N Sikki Reddy nata Indonesia nunger tarep Jafar Hidayatullah aser Aisyah Salsabila Putri Pranata nati 21-12 21-23 16-21 agi tsükdaktsüogo.

BILEMDANGANG

"Tazükba medeni nükjidong atongtsü tasak asütsü."